

200 milliuns per ils medis da chasa

Berset fa diever da sias cumpetenzas

DA LUCAS DEPLAZES / ANR

■ Ils medis da chasa han gudagnà. Els suvegnan uss indemnizaziuns pli autas da 200 milliuns francs per lur lavur. Dapli raps datti er per las lavurs da labor. Perquai han els uss retratg l'iniziativa. Tuttina ha il pievel l'ultim pled en il chapitel.

Quai è stà ina sensaziun, cura ch'ils medis han demonstrà il prim d'avrigl 2006 davant la chasa federala en scussal alv e fatg attent a lur situaziun alarmanta. Var 10 000 personas han suandà il clom dals iniziants. Il resultat è stà ina iniziativa dal pievel, inoltrada in onn pli tard cun passa 200 000 sutscrizziuns. Bain in cler mussament dal grond sustegn ch'ils medis da chasa han en la populaziun.

Ina correctura da la situaziun dals medis da chasa è absolutamain incontestabla. *Alain Berset*, il minister da la sanadad publica, ha previs en ses «Masterplan 2020 Hausarztmedizin und medizinische Grundversorgung» in meglierament da la situaziun professiunala e finanziaria dals medis da chasa. Berset ha incumbensà ils partenaris pertutgads – Santésuisse, FMH, H+ – da recaltgar ils meds finanziais necessaris en connex cun la revisiun da las tariffas. Concret vul quai dir ch'ils medis spezialisads – che gudognan bler dapli – avessan stuì far concessiuns en favur da lur collegas. Sco quai che *Verena Nold*, la directura da Santésuisse, ha declerà a chascun da la conferenza da pressa ils 25 da settember 2013, han las contractivas fatg naufragi.

Berset intervegn

Ussa ha il cusseglier federal Alain Berset fatg diever da sias cumpetenzas e decretà 200 milliuns francs en favur dals medis da chasa. Ins po quintar cun in augment da las indemnizaziuns per mintga pratica

da 25 000 fin 30 000 francs l'onn. Pli-navant duain 33 analisas che dattan al medi immediat scleriments e che al servan per formular ina diagnosa vegnir indemnizads meglier. L'ordinaziun en chausa duai entrar en vigur la stad 2014. La summa reservada per ils agens labors dals medis munta a 35 milliuns francs. Qua tras vegn dentant remunerà mo ina part da las sperditas decretadas l'onn 2009, sperditas che han provocà dira critica e che han prendì a divers medis il curaschi da cuntinuar cun lur pratica. Per la fasa transitoria vul Berset metter a disposiziun dals labors en las praticas dals medis da chasa ils 35 milliuns francs, scriva il Departament federal da l'intern

en sia comunicaziun a las medias dals 27 da settember 2013.

Revisiun da las tariffas


Tar la revisiun da las tariffas «Tarmed» ha pretendì Berset la neutralitad dals custs. En las contractivas cun ils divers partenaris duain vegnir transferids 200 milliuns francs en favur dals medis da chasa. Cunquai ch'ils partenaris n'han betg pudì esser d'accord fa Berset uss diever da sia cumpetenza subsidiara e vegn ad adattar sez las tariffas. Gist circuls che refusan uschiglio tuttas intervenziuns dal stadi han cun lur stinadad provocà ina tala.

Uschebain Santésuisse sco la Federaziun professiunala dals medis FMH èn

en princip satisfatgs da la decisiun. FMH refusa dentant ina midada da la repartiziun en il rom da la revisiun da las tariffas e pretenda ina cuntrafinanziaziun sin fundament d'ina basa d'economia da manaschi.

Il pievel ha il davos pled

Sin fundament da la decisiun da cusseglier federal Alain Berset han retratg ils iniziants lur iniziativa «Gea a la medischina da chasa». Cunquai che la cuntraproposta a l'iniziativa, acceptada dal parlament en questa sessiun d'atun, vegn francada en la constituziun federala sto il suveran prender posiziun. La votaziun è prevista per l'onn proxim.



Il cusseglier federal Alain Berset ha fatg diever da sias cumpetenzas e decretà 200 milliuns francs en favur dals medis da chasa.

KEYSTONE